Michel de Montaigne Essays

Book 2 · Chapter 34



Original text in Middle French (1595, Public domain) \cdot Last updated on February 1, 2025

HYPERESSAYS is a project to create a modern and accessible online edition of the *Essays* of Michel de Montaigne. More information at www.hyperessays.net

GOURNAY-2-34-20250201-103930

BOOK 2 · CHAPTER 34 HYPERESSAYS.NET

Observation sur les moyens de faire la guerre, de Julius Cæsar

a ON recite de plusieurs chefs de guerre, qu'ils ont eu certains livres en particuliere recommandation, comme le grand Alexandre, Homere : c Scipion Aphricain, Xenophon: a Marcus Brutus, Polybius: Charles cinquiesme, Philippe de Comines. Et dit-on de ce temps, que Machiavel est encores ailleurs en credit : Mais le feu Mareschal Strossy, qui avoit pris Cæsar pour sa part, avoit sans doubte bien mieux choisi : car à la verité ce devroit estre le breviaire de tout homme de guerre, comme estant le vray & souverain patron de l'art militaire. Et Dieu scait encore de quelle grace, & de quelle beauté il a fardé cette riche matiere, d'une façon de dire si pure, si delicate, & si parfaicte, qu'à mon goust, il n'y a aucuns escrits au monde, qui puissent estre comparables aux siens, en cette partie. a Je veux icy enregistrer certains traicts particuliers & rares, sur le faict de ses guerres, qui me sont demeurez en memoire. a Son armee estant en quelque effroy, pour le bruit qui couroit des grandes forces, que menoit contre luy le Roy Juba, au lieu de rabattre l'opinion que ses soldats en avoient prise, & appetisser les moyens de son ennemy, les ayant fait assembler pour les r'asseurer & leur donner courage, il print une voye toute contraire à celle que nous avons accoustumé : car il leur dit qu'ils ne se missent plus en peine de s'enquerir des forces que menoit l'ennemy, & qu'il en avoit eu bien certain advertissement : & lors il leur en fit le nombre surpassant de beaucoup, & la verité, & la renommee, qui en couroit en son armee. Suivant ce que conseille Cyrus en Xenophon : D'autant que la tromperie n'est pas de tel interest, de trouver les ennemis par effect plus foibles qu'on avoit esperé : que de les trouver à la verité bien forts, apres les avoir jugez foibles par reputation. a Il accoustumoit sur tout ses soldats à obeyr simplement, sans se mesler de contreroller, ou parler des desseins de leur Capitaine ; lesquels il ne leur communiquoit que sur le poinct de l'execution : & prenoit plaisir s'ils en avoyent descouvert quelque chose, de changer sur le champ d'advis, pour les tromper : & souvent pour cet effect ayant assigné un logis en quelque lieu, il passoit outre, & allongeoit la journee, notamment s'il faisoit mauvais temps & pluvieux. a Les Souisses, au commencement de ses guerres de Gaule, ayans envoyé vers luy pour leur donner passage au travers des terres des Romains ; estant deliberé de les empescher par force, il leur contrefit toutesfois un bon visage, & print quelques jours de delay à leur faire response, pour se servir de ce loisir, à assembler son armee. Ces pauvres gens ne sçavoient pas combien il estoit excellent mesnager du temps : car il redit maintes-fois, que c'est la plus souveraine partie d'un Capitaine, que la science de prendre au poinct les occasions, & la diligence, qui est en ses exploicts, à la verité, inouye & incroyable. a S'il n'estoit pas fort conscientieux en cela, de prendre advantage sur son ennemy, sous couleur d'un traicté d'accord : il l'estoit aussi peu, en ce qu'il ne requeroit en ses soldats autre vertu que la vaillance, ny ne punissoit guere autres vices, que la mutination, & la desobeyssance. Souvent apres ses victoires, il leur laschoit la bride à toute licence, les dispensant pour quelque temps des regles de la discipline militaire, adjoustant à cela, qu'il avoit des soldats si bien creez, que tous perfumez & musquez, ils ne laissoyent pas d'aller furieusement au combat. De vray, il aymoit qu'ils fussent richement armez, & leur faisoit porter des harnois gravez, dorez & argentez : afin que le soing de la conservation de leurs armes, les rendist plus aspres à se deffendre. Parlant à eux, il les appelloit du nom de compagnons, que nous usons encore : ce qu'Auguste son successeur reforma, estimant qu'il l'avoit faict pour la necessité de ses affaires, & pour flatter le cœur de ceux qui ne le suyvoient que volontairement :

b Rheni mihi Cæsar in undis Dux erat, hic socius, facinus quos inquinat, æquat.

a mais que cette façon estoit trop rabbaissee, pour la dignité d'un Empereur & general d'armee, & remit en train de les appeller seulement soldats. a A cette courtoisie, Cæsar mesloit toutesfois une grande severité, à les reprimer. La neufiesme legion s'estant mutinée aupres de Plaisance, il la cassa avec ignominie, quoy que Pompeius fust lors encore en pieds, & ne la receut en grace qu'avec plusieurs supplications. Il les rappaisoit plus par authorité & par audace, que par douceur. a Là où il parle de son passage de la riviere du Rhin, vers l'Allemaigne, il dit qu'estimant indigne de l'honneur du peuple Romain, qu'il passast son armee à navires, il fit dresser un pont, afin qu'il passast à pied ferme. Ce fut là, qu'il bastit ce pont admirable, dequoy il dechiffre particulierement la fabrique : car il ne s'arreste si volontiers en nul endroit de ses faits, qu'à nous representer la subtilité de ses inventions, en telle sorte d'ouvrages de main. a J'y ay aussi remarqué cela, qu'il fait grand cas de ses exhortations aux soldats avant le combat : car où il veut montrer avoir esté surpris, ou pressé, il allegue tousjours cela, qu'il n'eut pas seulement loisir de haranguer son armee. Avant cette grande battaille contre ceux de Tournay, Cæsar, dictil, ayant ordonné du reste, courut soudainement, ou la fortune le porta, pour exhorter ses gens, & rencontrant la dixiesme legion, il n'eut loisir de leur dire, sinon, qu'ils eussent souvenance de leur vertu accoustumee, qu'ils ne s'estonnassent point, & soustinsent hardiment l'effort des adversaires : & par ce que l'ennemy estoit des-ja approché à un ject de traict, il donna le signe de la battaille : & de là estant passé soudainement ailleurs pour en encourager d'autres, il trouva qu'ils estoyent des-ja aux prises : voyla ce qu'il en dit en ce lieu là. De vray, sa langue luy a faict en plusieurs lieux de bien notables services, & estoit de son temps mesme, son eloquence militaire en telle recommendation, que plusieurs en son armee recueilloyent ses harangues : & par ce moyen, il en fut assemblé des volumes, qui ont duré long temps apres luy. Son parler avoit des graces particulieres, si que ses familiers, & entre autres Auguste, oïant reciter ce qui en avoit esté recueilly, reconnoissoit jusques aux phrases, & aux mots, ce qui n'estoit pas du sien. a La premiere fois qu'il sortit de Rome, avec charge publique, il arriva en huict jours à la riviere du Rhone, ayant dans son coche devant luy un secretaire ou deux qui escrivoient sans cesse, & derriere luy, celuy qui portoit son espee. Et certes quand on ne feroit qu'aller, à peine pourroit-on attaindre à cette promptitude, dequoy tousjours victorieux ayant laissé la Gaule, & suivant Pompeius à Brindes, il subjuga l'Italie en dixhuict jours, revint de Brindes à Rome; de Rome il s'en alla au fin fond de l'Espagne; où il passa des difficultez extremes, en la guerre contre Afranius & Petreius, & au long siege de Marseille: de là il s'en retourna en la Macedoine, battit l'armee Romaine à Pharsale; passa de là, suivant Pompeius, en Ægypte, laquelle il subjuga; d'Ægypte il vint en Syrie, & au pays de Pont, où il combattit Pharnaces; de là en Afrique, où il deffit Scipion & Juba, & rebroussa encore par l'Italie en Espagne, où il deffit les enfans de Pompeius.

b Ocior & cæli flammis & tigride fæta.

Ac ueluti montis saxum de uertice præceps

Cùm ruit auulsum vento, seu turbidus imber

Proluit, aut annis soluit sublapsa uetustas,

Fertur in abruptum magno mons improbus actu,

Exultátque solo, siluas, armenta, virósque,

Involuens secum.

a Parlant du siege d'Avaricum, il dit, que c'estoit sa coustume, de se tenir nuict & jour pres des ouvriers, qu'il avoit en besoigne. En toutes entreprises de consequence, il faisoit tousjours la descouverte luy mesme, & ne passa jamais son armee en lieu, qu'il n'eust premierement reconneu. Et si nous croyons Suetone, quand il fit l'entreprise de trajetter en Angleterre, il fut le premier à sonder le gué. a Il avoit accoustumé de dire, qu'il aimoit mieux la victoire qui se conduisoit par conseil que par force. Et en la guerre contre Petreius & Afranius, la fortune luy presentant une bien apparente occasion d'advantage; il la refusa, dit-il, esperant avec un peu plus de longueur, mais moins de hazard, venir à bout de ses ennemis. b Il fit aussi là un merveilleux traict, de commander à tout son ost, de passer à nage la riviere sans aucune necessité.

b rapuitque ruens in prælia miles, Quod fugiens timuißet iter, mox uda receptis Membra fouent armis, gelidósque à gurgite, cursu Restituunt artus.

a Je le trouve un peu plus retenu & consideré en ses entreprinses, qu'Alexandre : car cettuy-cy semble rechercher & courir à force les dangers, comme un impetueux torrent, qui choque & attaque sans discretion & sans chois, tout ce qu'il rencontre.

b Sic tauri formis uoluitur Aufidus, Qui Regna Dauni perfluit Appuli Dum sæuit, horrendámque cultis Diluuiem meditatur agris.

a Aussi estoit-il embesongné en la fleur & premiere chaleur de son aage; là où Cæsar s'y print estant desja meur & bien avancé. Outre ce, qu'Alexandre estoit d'une temperature plus sanguine, cholere, & ardente: & si esmouvoit encore cette humeur par le vin, duquel Cæsar

estoit tres-abstinent : Mais où les occasions de la necessité se presentoyent, & où la chose le requeroit, il ne fut jamais homme faisant meilleur marché de sa personne. a Quant à moy, il me semble lire en plusieurs de ses exploicts, une certaine resolution de se perdre, pour fuyr la honte d'estre vaincu. En cette grande battaille qu'il eut contre ceux de Tournay, il courut se presenter à la teste des ennemis, sans bouclier, comme il se trouva, voyant la pointe de son armee s'esbranler : ce qui luy est advenu plusieurs autres-fois. Oyant dire que ses gens estoient assiegez, il passa desguisé au travers l'armee ennemie, pour les aller fortifier de sa presence. Ayant traversé à Dyrrachium, avec bien petites forces, & voyant que le reste de son armee qu'il avoit laissee à conduire à Antonius, tardoit à le suivre, il entreprit luy seul de repasser la mer par une tres-grande tormente : & se desroba, pour aller reprendre le reste de ses forces; les ports de delà, & toute la mer estant saisie par Pompeius. a Et quant aux entreprises qu'il a faicte à main armee, il y en a plusieurs, qui surpassent en hazard tout discours de raison militaire : car avec combien foibles moyens, entreprint-il de subjuger le Royaume d'Ægypte : & depuis d'aller attaquer les forces de Scipion & de Juba, de dix parts plus grandes que les siennes? Ces gens là ont eu je ne sçay quelle plus qu'humaine confiance de leur fortune : b & disoit-il, qu'il falloit executer, non pas consulter les hautes entreprises. a Apres la battaille de Pharsale, comme il eust envoyé son armee devant en Asie, & passast avec un seul vaisseau, le destroit de l'Hellespont, il rencontra en mer Lucius Cassius, avec dix gros navires de guerre : il eut le courage non seulement de l'attendre, mais de tirer droit vers luy, & le sommer de se rendre: & en vint à bout. Ayant entrepris ce furieux siege d'Alexia, ou il v avoit quatre vingts mille hommes de deffense, toute la Gaule s'estant eslevee pour luy courre sus, & lever le siege, & dressé une armee de cent neuf mille chevaux, & de deux cens guarante mille hommes de pied, quelle hardiesse & maniacle confiance fut-ce, de n'en vouloir abandonner son entreprise, & se resoudre à deux si grandes difficultez ensemble? Lesquelles toutesfois il soustint : & apres avoir gaigné cette grande battaille contre ceux de dehors, rengea bien tost à sa mercy ceux qu'il tenoit enfermez. Il en advint autant à Lucullus, au siege de Tigranocerta contre le Roy Tigranes, mais d'une condition dispareille, veu la mollesse des ennemis, à qui Lucullus avoit affaire. a Je veux icy remarquer deux rares evenemens & extraordinaires, sur le faict de ce siege d'Alexia : l'un, que les Gaulois s'assemblans pour venir trouver là Cæsar, ayans faict denombrement de toutes leurs forces, resolurent en leur conseil, de retrancher une bonne partie de cette grande multitude, de peur qu'ils n'en tombassent en confusion. Cet exemple est nouveau, de craindre à estre trop : mais à le bien prendre, il est vray-semblable, que le corps d'une armee doit avoir une grandeur moderee, & reglee à certaines bornes, soit pour la difficulté de la nourrir, soit pour la difficulté de la conduire & tenir en ordre. Aumoins seroit il bien aisé à verifier par exemple, que ces armees monstrueuses en nombre, n'ont guere rien fait qui vaille. «Suivant le dire de Cyrus en Xenophon, ce n'est pas le nombre des hommes, ains le nombre des bons hommes, qui faict l'advantage : Le demeurant servant plus de destourbier que de secours. Et Bajazet print le principal fondement à sa resolution, de livrer journee à Tamburlan, contre l'advis de tous ses Capitaines, sur ce, que le nombre innombrable des hommes de son ennemy luy donnoit certaine esperance de confusion. Scanderbech bon juge & tres-expert, avoit accoustumé de dire, que dix ou douze mille combattants fideles, devoient baster à un suffisant chef de guerre, pour garantir sa reputation en toute sorte de besoing militaire. a L'autre poinct, qui semble estre contraire, & à l'usage, & à la raison de la guerre, c'est que Vercingentorix, qui estoit nommé chef & general de toutes les parties des Gaules, revoltees, print party de s'aller enfermer dans Alexia. Car celuy qui commande à tout un pays ne se doit jamais engager qu'au cas de cette extremité, qu'il y allast de sa derniere place, & qu'il y eust rien plus à esperer qu'en la deffense d'icelle. Autrement il se doit tenir libre, pour avoir moyen de prouvoir en general à toutes les parties de son gouvernement. a Pour revenir à Cæsar, il devint avec le temps un peu plus tardif & plus consideré, comme tesmoigne son familier Oppius : estimant, qu'il ne devoit aisément hazarder l'honneur de tant de victoires, lequel, une seule defortune luy pourroit faire perdre. C'est ce que disent les Italiens, quand ils veulent reprocher cette hardiesse temeraire, qui se void aux jeunes gens, les nommans necessiteux d'honneur, bisognosi d'honore: & qu'estans encore en cette grande faim & disette de reputation, ils ont raison de la chercher à quelque prix que ce soit : ce que ne doivent pas faire ceux qui en ont desja acquis à suffisance. Il y peut avoir quelque juste moderation en ce desir de gloire, & quelque sacieté en cet appetit, comme aux autres : assez de gens le pratiquent ainsi. a Il estoit bien esloigné de cette religion des anciens Romains, qui ne se vouloient prevaloir en leurs guerres, que de la vertu simple & nayfve. Mais encore y apportoit il plus de conscience que nous ne ferions à cette heure, & n'approuvoit pas toutes sortes de moyens, pour acquerir la victoire. En la guerre contre Ariovistus, estant à parlementer avec luy, il y survint quelque remuement entre les deux armees, qui commença par la faute des gens de cheval d'Ariovistus : Sur ce tumulte, Cæsar se trouva avoir fort grand advantage sur ses ennemis, toutes-fois il ne s'en voulut point prevaloir, de peur qu'on luy peust reprocher d'y avoir procedé de mauvaise foy. a Il avoit accoustumé de porter un accoustrement riche au combat, & de couleur esclatante, pour se faire remarquer. a Il tenoit la bride plus estroitte à ses soldats, & les tenoit plus de court estants pres des ennemis. a Quand les anciens Grecs vouloient accuser quelqu'un d'extreme insuffisance, ils disoient en commun proverbe, qu'il ne sçavoit ny lire ny nager : il avoit cette mesme opinion, que la science de nager estoit tres-utile à la guerre, & en tira plusieurs commoditez : s'il avoit à faire diligence, il franchissoit ordinairement à nage les rivieres qu'il rencontroit : car il aimoit à voyager à pied, comme le grand Alexandre. En Ægypte, ayant esté forcé pour se sauver, de se mettre dans un petit batteau, & tant de gens s'y estants lancez quant & luy, qu'il estoit en danger d'aller à fonds, il aima mieux se jetter en la mer, & gaigna sa flotte à nage, qui estoit plus de deux cents pas au delà, tenant en sa main gauche ses tablettes hors de l'eau, & trainant à belles dents sa cotte d'armes, afin que l'ennemy n'en jouyst, estant desja bien avancé sur l'aage. a Jamais chef de guerre n'eut tant de creance sur ses soldats : Au commencement de ses guerres civiles, les centeniers luy offrirent de soudoyer chacun sur sa bourse, un homme d'armes, & les gents de pied, de le servir à leurs despens : ceux qui estoient plus aisez, entreprenants encore à deffrayer les plus necessiteux. Feu Monsieur l'Admiral de Chastillon nous fit veoir dernierement un pareil cas en nos guerres civiles : car les François de son armee, fournissoient de leurs bourses au payement des estrangers, qui l'accompagnoient. Il ne se trouveroit guere d'exemples d'affection si ardente & si preste, parmy ceux qui marchent dans le vieux train, soubs l'ancienne police des loix. c La passion nous commande bien plus vivement que la raison. Il est pourtant advenu en la guerre contre Hannibal, qu'à l'exemple de la liberalité du peuple Romain en la ville, les gendarmes & Capitaines refuserent leur paye; & appelloit on au camp de Marcellus, mercenaires, ceux qui en prenoient. a Ayant eu du pire aupres de Dyrrachium, ses soldats se vindrent d'eux mesmes offrir à estre chastiez & punis, de façon qu'il eut plus à les consoler qu'à les tancer. Une sienne seule cohorte, soustint quatre legions de Pompeius plus de quatre heures, jusques à ce qu'elle fut quasi toute deffaicte à coups de traict, & se trouva dans la tranchee, cent trente mille flesches. Un soldat nommé Scæva, qui commandoit à l'une des entrees, s'y maintint invincible ayant un œil crevé, une espaule & une cuisse percees, & son escu faulsé en deux cents trente lieux. Il est advenu à plusieurs de ses soldats prins prisonniers, d'accepter plustost la mort, que de vouloir promettre de prendre autre party. Granius Petronius, pris par Scipion en Affrique, Scipion apres avoir faict mourir ses compagnons, luy manda qu'il luy donnoit la vie, car il estoit homme de rang & questeur : Petronius respondit que les soldats de Cæsar avoient accoustumé de donner la vie aux autres, non la recevoir ; & se tua tout soudain de sa main propre. a Il y a infinis exemples de leur fidelité : il ne faut pas oublier le traict de ceux qui furent assiegez à Salone, ville partizane pour Cæsar contre Pompeius, pour un rare accident qui y advint. Marcus Octavius les tenoit assiegez ; ceux de dedans estants reduits en extreme necessité de toutes choses, en maniere que pour suppleer au deffaut qu'ils avoient d'hommes, la plus part d'entre eux y estans morts & blessez, ils avoient mis en liberté tous leurs esclaves, & pour le service de leurs engins avoient esté contraincts de coupper les cheveux de toutes les femmes, afin d'en faire des cordes ; outre une merveilleuse disette de vivres ; & ce neantmoins resolus de jamais ne se rendre : Apres avoir trainé ce siege en grande longueur, d'où Octavius estoit devenu plus nonchalant, & moins attentif à son entreprinse, ils choisirent un jour sur le midy, & comme ils eurent rangé les femmes & les enfants sur leurs murailles pour faire bonne mine, sortirent en telle furie, sur les assiegeans, qu'ayants enfoncé le premier, le second, & tiers corps de garde, & le quatriesme, & puis le reste, & ayans fait du tout abandonner les tranchees, les chasserent jusques dans les navires : & Octavius mesmes se sauva à Dyrrachium, où estoit Pompeius. Je n'ay point memoire pour cett'heure, d'avoir veu aucun autre exemple, où les assiegez battent en gros les assiegeans, & gaignent la maistrise de la campagne; ny qu'une sortie ait tiré en consequence, une pure & entiere victoire de bataille.